



Ole Jon Bakke
Sogge
6300 ÅNDALSNES

Rauma kommune - løyve til planting av nordmannsedelgran for juletreproduksjon på gnr8 bnr3 Ole Jon Bakke

Fylkesmannen i Møre og Romsdal gjev Ole Jon Bakke løyve til utsetting av nordmanns-edelgran for juletreproduksjon på gnr 8 bnr 3 i Rauma kommune. Løyvet gjeld for suppleringsplanting med 1000 stk. tre på eit areal på ca. 2 daa, UTM 6930150 431510, jf. avmerka areal i vedlegget til søknaden.

Løyvet er gitt i medhald i §§ 4 og 5 i “Forskrift om utsetting av utenlandske treslag til skogbruksformål”. Det er sett vilkår til løyvet.

Vi viser til søknad datert 20.03.2013. Søknaden gjeld utsetting av nordmannsedelgran (*Abies nordmanniana*) på eigdommen 8/3 i Rauma kommune. Plantefeltet er avmerka i kartvedlegget til søknaden. Formålet med utsettinga er juletreproduksjon. Søknaden gjeld 1000 stk tre på eit eksisterande, planta areal på 2 dekar.

Utsetting av utanlandske treslag krev løyve etter forskrift om utsetting av utanlandske treslag til skogbruksformål av 25.05.2012 (heretter kalla forskrifta). Formålet med forskrifta er å hindre at utsetting av utanlandske treslag medfører eller kan medføre uheldige følger for naturmangfoldet, jf. § 1.

Søknaden skal vurderast etter prinsippa i §§ 8-12 i naturmangfaldlova (NML), jf. § 7 i NML.

Vurdering

Ved vurdering av om det skal gjevast løyve til utsetting, skal eventuelle uheldige følger for naturmangfaldet vektleggast. Det skal leggst særleg vekt på om treslaget og eventuelle følgjeorganismar medfører risiko for uheldige følger for det biologiske mangfaldet. Det kan ikkje gjevast løyve viss det er grunn til å tru at utsettinga vil medføre vesentlege uheldige følger for det biologiske mangfaldet, jf. § 7 i forskrifta. Utplanting av utanlandske treslag kan ha ein negativ påverknad på naturmangfaldet ved å endre den naturlege artssamansetnaden og dei økologiske funksjonane på staden.

Kunnskapsgrunnlaget (NML § 8)

Nordmannsedelgran er ikkje klassifisert av Artsdatabanken med tanke på økologisk risiko. Ut frå vurderinga av den nærståande arten fjelledelgran som har fått låg risiko, så vurderer vi nordmannsedelgrana til ikkje å ha nokon påverknad på norsk natur ut over den effekten dei har på det arealet dei blir planta på.

I følgje søknaden er føremålet med utsettinga å produsere juletre. Trea blir difor hausta før dei set kongler, og feltet vert rydda etter at salgbare tre er hogde. Det er difor ingen fare for spreiring av desse artane til naturen kring feltet.

Vi har vurdert dei naturfaglege kvalitetane til plantearealet. Det vert oppgjeve at dette er ein eksisterande juletreplantasje der det skal supplerast med nye tre. Arealet ligg i Isterdalen, der det verna vassdraget Istra utgjer eit markert landskapselement. Våtmarkssystemet til Istra med kroksjøar, meanderer og flomdammar er registrert som svært viktige naturtype i Naturbase. Juletrefeltet ligg på eit høgare terrengnivå, og vil ikkje komme i konflikt med elva og det kringliggande våtmarkssystemet.

Ei suppleringsplanting i eksisterande felt vil ikkje medføre spesielle landskapsmessige endringar i dette kulturlandskapet. Ut frå føreliggande kunnskap vil det ikkje medføre uheldige følgjer for naturmangfaldet.

Føre-var-prinsippet (NML § 9)

Vi vurderer vidare at behovet for å avslå, evt. krevje tilleggsutgreiingar på grunnlag føre-var-prinsippet er lite.

Økosystemtilnærming og samla belastning (NML § 10)

Vi kan ikkje sjå at planting medfører noko belastning som skulle utløyse noko uheldig, samla situasjon for eit område eller ein naturtype.

Kostnadane ved miljøforring (NML § 11)

Ole Jon Bakke kan påleggast å fjerne utilsikta spreiring av utplanta nordmannsedelgran. Fylkesmannen kan pålegge tiltak etter NML §§ 69-73.

Miljøforsvarlege teknikkar og driftsmetodar (NML § 12)

Fjerning av alle trea før frøsetting vil vere eit tilstrekkeleg tiltak for å hindre spreiring. I tillegg er den som har fått løyvet til utsetting pliktig til å føre internkontroll, jf. § 10 i forskrifta.

Konklusjon

Vi vurderer det til å vere små negative effektar på naturmangfaldet i utsettingsområdet som følgje av suppleringsplanting av nordmannsedelgran. Med bakgrunn i opplysningane i søknaden og kunnskapsgrunnlaget, vurderer vi spreingsfaren som låg, og faren for negative økologiske effektar som liten.

Fylkesmannen i Møre og Romsdal gir Ole Jon Bakke etter dette løyve til utsetting av nordmannsedelgran på gnr 8 bnr 3 som omsøkt. Løyvet gjeld for 1000 stk. tre på eit samla areal på 2 daa avmerka i vedlegget til søknaden, jf. §§ 4 og 5 i *Forskrift om utsetting av utenlandske treslag til skogbruksformål*. Vi viser vidare til krava i forskrifta §§ 8, 9 og 10 om hhv. varsemd, informasjonsplikt og krav til internkontroll.

Det vert sett følgjande vilkår til løyvet:

- 1) Etter at felta er hausta, skal alle ikkje-omsettbare tre fellast. Dette skal gjerast slik at det ikkje kjem skott frå greiner eller stubbe. Feltet skal uansett ryddast innan år 2027.
- 2) Det er ikkje tillate å fjerne tre med voksedyktig rot frå feltet. Dette skal hindre ukontrollert spreining av artane.
- 3) Dersom det vert oppdaga spreining av tre utanfor plantefelta, skal desse fjernast, og Fylkesmannen i Møre og Romsdal må varslast.
- 4) Løyvet skal oppbevarast hos tiltakshavar og grunneigar inntil vilkåra i løyvet er oppfylt, jf. § 7 fjerde ledd i forskrifta.

Vedtaket kan påklagast til Direktoratet for naturforvaltning innan tre veker i samsvar med forvaltningslova. Ein eventuell klage skal opplyse om kva endringar ein ønskjer i vedtaket, og skal sendast til Fylkesmannen i Møre og Romsdal.

Med helsing

Ulf Lucasen (e.f.)
seksjonssjef

Ola Betten

Dokumentet er elektronisk godkjent og har ingen signatur.

Kopi:

Direktoratet for naturforvaltning	Postboks 5672 Sluppen	7485	TRONDHEIM
Rauma kommune	Vollan 8 A	6300	ÅNDALSNES